

DOMENIE VII «VIE PAL AN»

Antifone di jentrade Sal 12,6

Intal to boncûr, Signôr, o ài vude fede;
che si indalegri il gno cûr te tô salvece.
I cjantarai al Signôr che mi à judât.

Colete

Diu onipotent, danus la gracie
di meditâ simpri ce che al è just,
par podê fâ, cu lis peraulis e cu lis voris, lis robis che ti plasìn.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 1 Sam 26,2.7-9.12-13.22-23

Il Signôr ti veve metût tes mêns mans e jo no ài volût slungjâ la mê man.

Dal prin libri di Samuel

In chei dîs, Saul si metè in marce, al lè jù tal desert di Zif cun trê mil oms, i plui bulos di Israel, par fâ saltâ fûr David dal desert di Zif.

E cussì David e Abisai a lerin jù, di gnot, fin li che a jerin intropâts chei altris: a cjatarin Saul distirât e indurmidît tal campament, cu la sô lance impirade in tiere da cjâf di lui, e Abner e i soldâts a jerin distirâts ator di lui. Alore Abisai i disè a David: «Vuê Diu ti à metût il to nemî tes tôs mans. Poben, lassimal a mi, che lu inclaudi in tiere cu la sô lance, cuntun colp, cence dibisugne di molâdint un altri». Ma David i disè a Abisai: «No sta copâlû! Cui rivaressial a metii lis mans intor al onzût dal Signôr e a fâle francje?».

David al cjolè la lance da cjâf di Saul e la bufule da l'aghe e si 'nt lerin: nissun nol viodè e nissun nol savè, nissun no si sveà, che ducj a durmivin come çocs parcè che ur jere plombade intor une pendolarie mandade dal Signôr. David al passà di chê altre bande e si fermà su la spice de mont, lontan. A jerin une vore distants un dal altri.

David al berlà: «Ve la lance dal re. Un dai zovins che al vegni sù a cjolile. Il Signôr i darà a ognidun seont justizie e fedeltât: vuê il Signôr ti veve metût tes mêns mans e jo no ài volût slungjâ la mê man cuintri dal consacrât dal Signôr».

Peraule di Diu.

SALM RESPONSORIÂL dal Salm 102

R. Il Signôr al è bon e grant intal amôr.

Benedis, anime mê, il Signôr,
dut ce che al è in me il so non sant al benedissi.
Benedis, anime mê, il Signôr,
e no sta lassâ in dismentie nissun dai siei plasês. **R.**

Lui ti à perdonadis dutis lis tôs colpis,
ti à vuarît di ducj i tiei mâi;
al à tirade fûr de buse la tô vite,
ti à incoronât di boncûr e di gracie. **R.**

Bon e di boncûr al è il Signôr,
pegri tal inrabiâsi e grant tal perdonâ lis colpis.
No nus à tratâts daûr dai nestris pecjâts;
no nus à paiâts daûr des nestris colpis. **R.**

Come che al è lontan dal amont il jevâ dal soreli,

cussì al à slontanât di nô lis nestris colpis.
Come che un pari al à dûl dai siei fîs,
cussì il Signôr al à dûl di chei che lu rispjetin. **R.**

SECONDE LETURE 1 Cor 15,45-49

Come che o vin puartât il stamp dal om di pulvin, cussì o puartarìn il stamp dal om dal cîl.

De prime letare di san Pauli apuestul ai Corints

Fradis, il prin om, Adam, al è diventât une creature vive, ma l'ultin Adam al è diventât spirt che al dà vite. Però nol è stât prime il cuarp spirituâl, ma il naturâl, e dopo il spirituâl. Il prin om, tirât fûr de tiere, al è di pulvin, ma il secont om al ven dal cîl. Come che al è l'om di pulvin, cussì a son chei di pulvin; come che al è chel dal cîl, cussì a saran ancje chei dal cîl. E come che o vin puartât il stamp dal om di pulvin, cussì o puartarìn il stamp dal om dal cîl.

Peraule di Diu.

CJANT AL VANZELI Zn 13,34

R. Aleluia, aleluia.

Us doi un comandament gnûf, al dîs il Signôr:
che si voledis ben un cul altri,
come che ancje jo us ài volût ben a vualtris.

R. Aleluia.

VANZELI Lc 6,27-38

Vêt remission come che al à remission Diu, vuestri Pari.

Dal vanzeli seont Luche

In chês volte, Jesù al disè ai siei dissepui: «A vualtris che mi scoltais us dîs: Volêt ben ai vuestris nemîs, fasêt ben a di chei che us odein. Benedît chei che us maledissin; preait par chei che us fasin mâl. Se cualchidun ti dà un pataf di une bande de muse, presentii ancje chês altre; se cualchidun ti gjave la manteline, lasse che ti cjoli ancje la tonie. Dàur a ducj chei che ti domandin; e se cualchidun ti robe ce che al è to, no sta tornâjal a domandâ indaûr. E come che o volês che us fasin chei altris, cussì fasêt ancje vualtris cun lôr. Se ur volês ben dome a di chei che us vuelin ben, ce merit varêso? Ancje i pecjadôrs a fasin compagn. E se ur fasês ben dome a di chei che us fasin ben, ce merit varêso? Ancje i pecjadôrs a fasin compagn. E se ur imprestais dome a di chei che o sperais di cjapâ, ce merit varêso? Ancje i pecjadôrs a imprestin ai pecjadôrs par vê indaûr compagn. Volêt ben invezit ai vuestris nemîs, fasêt ben e imprestait cence sperâ nuie sore, e la vuestre ricompense e sarà grande e o sarês fîs dal Altissim. Di fat lui al è bon ancje cun chei che no àn agrât e cui triscj. Vêt remission come che al à remission Diu, vuestri Pari. No stait a giudicâ e no sarês giudicâts. No stait a condanâ e no sarês condanâts. Perdonait e us vignarà perdonât. Dait e us vignarà dât: int cjaparês in misure buine, cjalcjade, scjassade e incolme di spandî, parcè che cun chês stesse misure che o misurais, us vignarà misurât ancje a vualtris».

Peraule dal Signôr.

Su lis ufiertis

Celebrant i tiei misteris cul rivuart che a mertin,
ti prein, Signôr,
che al zovi pe nestre salvece
ce che o ufrin in onôr de tô maiestât.
Par Crist nestri Signôr.

Antifone a la comunion Sal 9,2-3

O vuei contâ dutis lis robonis che tu âs fatis.
O vuei jessi content e plen di ligrie,

o vœi cjantâ il to non, Altissim.

Daspò de comunion

Diu onipotent, danus par plasê di rivâ a chê salvece
che midiant di chescj misteris
o vin vude la capare.
Par Crist nestri Signôr.